

靜
思
先
生
詩
集
上
冊



靜思先生詩集卷之上

元虞士吉水桂林郭鈺彥章著

國子生八世從孫廷昭編

五七言古風

和劉氏蓬軒歌

往與丹丘仙人泛舟弱水之西採藥蓬萊之下笑坐
蓬牕中蓬外春如畫三生不得塵緣謝老去人間結
茅舍却羨劉郎所作之蓬軒山水娛人甚瀟灑春風
淡泊春雲陰花枝窈窕簾櫳深劉郎酒初醒獨坐蓬
軒吟月浸澄江雁無影桂樹吹香秋夜永劉郎歌未

終更向蓬軒飲蓬軒飲後醉復吟樓船美人散如煙
英雄回首皆神仙千金買閒不惜費何日蓬軒容我
醉挂衣薜蘿落巖花蕩槩芙蓉弄秋水夜半天風捲
翠濤種來修竹齊雲高待把長虹繫明月海上重來
釣六鰲

題郭伯澄西菴山居

白日上東山晴光射西菴西菴山人開曉關一襟暖
翠濃如染門前流水玉虹明樹上啼鸞金羽輕自掃
落花客初到共題修竹詩先成十載戰塵迷道路西
菴只今成久住移竹春溪長子孫種梅晚歲為賓主

丈夫揚眉天地間山林朝市俱等閒出為公卿入為
士古人高節非難攀聞君近年溪閉戶烏帽青燈讀
書苦劍寒新淬冰雪光松老終無棟梁具西菴山深
竹迳微我來欲共薜蘿衣一朝富貴逼君去燕雀空
羨冥鴻飛

採蕨歌

朝採蕨南山側暮採蕨北山北穿雲伐石飛星裂手
脚凍皴腰欲折紫芽初長粉如脂瘦根蟠屈蛟蛇結
吞聲出門腹已饑猿啼風擺藤蘿衣長鐮短笠日將
暮攀援垠堦何當歸朝採蕨暮採蕨東隣老翁更悽

惻抱巖轉死長松
根妻子眼穿淚成血
情知世亂百憂煎
得歸茅屋心懸懸
癡兒啼怒炊煙晚
打門又索軍需錢
君不見將軍擁旌節
紅樓夜醉梨花月

畫山水歌贈楊彥正

憶我往歲山中居
山水娛人忘讀書
釣魚獨坐溪石久
看竹每過隣人居
蒼松鶴帶白雲下
紫蘿猿抱晴煙虛
而我扶醉騎蹇驢
誰人不道似是浣花之畫圖
自逆喪亂走南北
甚欲畫之不可得
楊君揮翰頗風流
雲山為作秋三疊
寒鴉隔浦淡微茫
老樹懸崖交屈鐵
門前芝草澗中石
稚子松根採殘葉
知君所畫

非青原令我展轉思
故園山橋野迳宛相似
桂樹正對梅花村
清秋毫末瘦蛟舞
白日座上銀河翻
問君何得最奇古
十載苦心思董元
董元舊任浙江上門對
吳山聳千丈
有時登高望海潮
老懷揮霍增雄壯
遺跡百年今盡忘
戰塵千里吾安往
但將此畫掛高堂
清秋卧聽松風響

題秋江送別圖送楊亨衢少府叅安成軍事

揚少府紫駟馬
黃金鞭團花戰袍
綉兩肩腰下雕弓
懸迥若秋鷹解條
鏃縱之颯颯凌千仞
之蒼烟酒酣拔劍
玉龍舞喝令兩飛
白日回中天
簸海腥風白波

立厯空殺氣玄雲連緣邊諸將亦無數畫擁旌旗夜
搗鼓豹韜令變待參謀太守掄材君獨去送君江上
君甚懼江風吹雪蘆花寒知君心事如秋水故應寫
入畫圖看問誰畫者謝君績不盡琵琶美人泣舟子
揚帆發棹歌主人解劍停盃立我亦送軍今四年男
兒姓名何足憐老親白髮長相憶只得還家種薄田

送友人送軍兼呈謝君績參軍

歎息復歎息歎息長書空殺賊五年無寸功今者又
送君送戎七星戰袍襯金甲三山尖帽飄猩紅牙旂
曉發玉花驄猛士雙劍立西東爺娘妻子不用哭上

馬更勸黃金鐘黃金鐘琥珀濃豪氣千尺搖晴虹明
日軍門揖主將論軍未可皆雷同安成之寇容易攻
廬陵凋弊遺民窮自非奇謀決擒縱煩費日久誰當
供君家伯仲盡少年正好變化板飛龍頗聞幕府多
才雄為我問信母忽忽我有大羽箭不殺南飛鴻要
如魯仲連繫書射入聊城中祇緣骨相不受封不如
扁舟歸去長伴滄浪翁

鶴將雛同李文麟賦

鶴將雛願雛長結巢千尺蒼松上自矜毛骨殊凡鳥
不敢向朝哺夕抱羽翼成風鶴雲鵬共還往柰何挾

彈子窺巢攫其雛，
雖小豈能充爾腹。
老大育子恩勤，
渠荒村風雨母歸急。
空巢深鎖寒煙孤，
哀鳴上下尾畢逋。
人之愛子皆苦子，
鴟鵂無處無君不見黃雀何足道。
揚寶飼之玉環報。

貽郭恒

月懸松露明，
鶻啼浦烟破。
遙想山中人，
此時正思我。
我行忽隨滄江邊，
度盡春風無一錢。
向來自是釣鰲客，
至今思拍洪崖肩。
洪崖不可招，
蓬萊在何處。
鋪遍閑愁芳草路，
千樹綠陰晝如雨。
錦字書成人不來，
銀燭花殘誰與度。
近日聞君多好懷，
雪色白紵佳人裁。

小樓紈扇低，
徘徊釀酒好。
近榴花開，
榴花開我歸來。

效范先生侏儒行

君不見侏儒長三尺，
有錢可使粟可食。
虎豹天閔深九重，
直犯龍顏請恩澤。
方朔昂昂飢欲死，
每一見之長嘆息。
長嘆息將何如，
東家之丘九尺軀。
徧走天下無停車，
絕糧於陳逐於魯。
皇皇何用三千徒，
嗚呼皇皇何用三千徒。
吾寧飽死作侏儒。

春夜寒

余值時危一窮到骨，
薪米不給，恒自謂不敢。
僥倖今春雨雪連旬，
擁牛衣以熬長夜寒砭。

飢骨遂成疔瘡可感也哉貧而無怨聖人以
為難余今雖怨其又奈何發為歌詩私寫以
示平昔之窮交庶幾知己不為時貴所笑云
春雨暗空雜春雪閉門十日紅爐絕寒壓破衾夜悽
惻鼓角聲酣千轉側苦竹蕭蕭茅屋欹懸崖磔磔啼
猿切蒼檜拂風不自支碧桃醉曉何由得吞聲強起
添牛衣接迹不如投蟻穴立登霄漢奮長策死填溝
壑抱奇節奈何貧病相驅迫少壯幾時頭欲白更聞
山鬼瞰孤燈火攻水戰骨如折隣曲尋常疎往還妻
孥劬瘁忘梳櫛謬美平生坐不耕時危况渡山河窄

汗馬白下樹功勳儒冠俯仰無顏色讀書恐作公孫
諛種菊願依陶令宅志士百年慎語默誰云出處輕
如葉每想淮陰酬漢恩但欲功名垂竹帛國士從來
不易知解衣推食寧為德悠悠今古誰知心慷慨高
歌唾壺缺君不見凍雀紇于棲一枝彩鳳崑丘翻六
翻

題三顧草廬圖

盡史紛紛滿天下君之此圖誰所畫倚山茅屋野人
居門前何得將軍馬得非孔明卧隆中坐令玄德來
趨風十載烟塵戰群虎一朝雲氣隨飛龍英雄契合

人莫測死如魚水惟相得抱膝長歌梁父吟上馬已
無曹孟德三分割據功業成用之惟在知人明千鈞
漢鼎懸三顧丹青欲寫空凝情嗚呼河北二十四郡
墮名城君王不識顏真卿

母棄子同劉茂材賦

母棄子子幼情可憐子長母還去為子空思愆龍爭
虎鬪事翻覆寶玦王孫捐骨肉十年母子安茅屋菽
水真情無不足奈何一朝辭故幃子也慟哭牽母衣
母今棄兒不敢怨父在深恩母當念母如不聞竟不
留黃昏門掩青燈愁負米歸來飲殘泣他家兒女何

綢繆噫噓噉邇來萬事足悲咤負德辜恩滿天下丈
夫盡為溫飽謀婦人何得母重嫁

題歐陽先生段君墓誌銘後

翰林歐陽公文章妙天下段君墓碑親手題美玉精
金動高價雄詞傳世發幽光奇氣騰空照長夜段君
有子渥洼馬榮親何待為卿亞白雲山空心共飛宰
樹雨寒泪盈把嗟我邑子棲林野白鷺青原滿儒雅
今晨始得讀君碑才名豈是尋常者鐘鼓清時金谷
園衣冠前輩洛陽社人間萬事力可為子孫振耀古
來寡君家舊德今見之復使鄉邦共悲咤何時却得

拜君墳臨風絮酒哀悰寫

題羅子澄所藏乃父晉仲文學桂林圖

我觀桂林圖喜極翻長吁江山城郭不盈幅恍若經
行千里餘宦遊徃歲羅文學此圖正為思親作戲綵
魂飛白鷺洲望雲腸斷楚王閣自泛南北吹戰塵邊
鴻不到江魚沉有子芳年滯鄉國長日攬圖思桂林
父在桂林獨思母子今思父更愁苦太平干祿為親
榮今日官高渺何許還君此圖神凜然忠臣孝子無
後先一家骨肉眼前好百歲功名紙上傳君不見大
真來作南洲客禿襟老淚傷頭白

龍伯淵席上和周子諒長歌兼呈諸君子

伯夷登西山魯連蹈東海烈士懷苦心海枯石爛終
無改蕭蕭華髮吹秋霜夜煮白石充飢腸人情俯仰
今異昔惟有青山似故鄉桐江江上一携手公子華
筵誰不有賦筆每慚崔顥詩持盃願飲茅容酒銀燭
花高照座空笑談頗有前賢風好懷傾寫向誰是或
執纓涎嘲神龍老我踈狂眼常白欲麾凍蠅清几格
不須浪說管鮑交眼中誰有真顏色百年聚散如搏
沙東風燕子還西家群仙天上擷飛霞君歸好醉瑯
林花

送王醫

東風吹樹千鈞力怒勢呼號兩相敵回飈蕭颯入霜
林敗葉紛披散無迹老夫倚杖長歎息百年三萬六
千日莊生齊物物不齊誰鑄紅顏等金石王君笑我
何大癡太極初分有伸屈天根月窟窺端倪靈臺天
迥丹光溢柰何寸地攢千兵朝似瓠肥暮如腊自非
一氣回孤根宇宙幾何皆鬼域乃知燮理藉登庸瘡
痍變作謳歌入感君此言足寸識知君用心渺難及
君不見長生之藥蓬萊多送君歸去君如何

贈峽江王巡檢

淮海龍飛乘五雲攀鱗附翼多殊勲英雄變化不知
數我今獨識王將軍將軍好武稱第一慷慨功名年
少日劍術出奇愁白猿兵符借重祠黃石近報三軍
掠薊丘萬馬夜渡黃河流將軍豈徒成一障成功獨
早還優游巴丘官衙俯江水兩岸人烟鬱蒼翠不隨
李廣獵南山却向楊雄問奇字雕弓羽箭挂前除座
中賓客多文儒煮茶烟細浮蒼竹把釣江清出白魚
人生宦途須適意大隱從來在朝市將軍美譽播南
州纏腰騎鶴徒為爾君不見凌煙閣上開畫圖褒公
鄂公氣骨殊君臣際會總如此嗟我閉門空讀書

題追風圖

百金曾買櫪上駒，權奇神駿人間無。奚官絕力相控，
制出門已空千里途。大明殿前早朝罷，揚鞭半是追
風者。君不見，狒狼獻天馬，白髮江南今見畫。

題宋仲觀所藏竹圖

王猷愛竹借竹看，何如寫此青琅玕。筆分雲氣千畝
足，窓涵風色三秋寒。淡枝濃葉歲年久，能使良工名
不朽。君不見，長竿千尺餘，世上誰為釣鰲手。

題劉履初所藏莫慶善鷹

日光懸秋凜，翻齊欲飛不。飛愁雲低足，無條斂腹無。

食空林尚恐難安棲，筆力精到天機微。莫生所畫詩
我題，君不見，天下太平角端語，狐兔草間何足數。

送耒陽李中卿

干祿自為通，滔滔逝水何時窮。隱居自為介，恹恹龍
泉閔，光彩何如耒陽李中卿。出也處也俱光榮，往者
時危魯學武，彎弓射殺南山虎。一朝姓名貢玉堂，朝
回滿袖携天香。祗今辭官歸舊隱，五柳先生住相近。
石徑掃苔客正來，荷亭置酒花半開。清夜夢回思舊
事，天語溫存猶在耳。却送雲氣望蓬萊，百年窮達安
在哉。人臣大節保終始，滿眼官寮少能似。泰山峩峩

河水長君恩於爾不可忘嗚呼君恩於爾不可忘

題郭原振所藏魚卷

往者觀魚曾泛洞庭舟鯨飛蛟舞令人愁不似君家
翫新畫滿眼潑潑仍悠悠風急欲牽流荇碧寔虛可
數金鱗密柳花吹動浪微生雲氣流空墨猶濕不須
把釣凌煙波對此其如秋夜何萬頃波濤翻白屋長
篙棹月來相過君不見聖代恩波及魚鳥久矣龜龍
在宮沼池邊試問吃毫人壁間變化春雷曉

送王葵師

南山改舊壠北山開新塋行人路上總稱好誰其相

者王先生王先生雙眼明吾聞其語心為驚江山隨
運有遷改人物乘機分重輕指揮能事敷玄化何必
長抱青囊經嗟余獨居環堵室每一見之長歎息君
家科第舊聞名自經世變嗟何及河南南陽多貴人
長平坑卒無哭聲星翁筮史常相過專門堅白吾何
憑衡嶽由來凌絕頂青山有盡雲無盡更百千年似
眼前春蚕畢竟誰為枕東家求富西厭貧倒屣相迎
如父兄伯牙抱琴子期聽傾人意氣輕千金秋風江
上君重到為君酌酒開懷抱杏花春早日邊開松樹
歲寒雪中老

和李子晦

大鵬高飛絕南國萬里扶搖六月息歸來老屋翫圖
書細看箕疇終用十飄飄美人貯八斗凜凜長身逾
九尺技學屠龍未能試桑田成海嗟何及游泳詞林
醉六經熟路何資鞭辟力子陵不報故人書商翁終
為太子客嗟余抱病深山深慚與比隣少相識破硯
秃筆那復存惟有當年無孔笛四海交游晚得君不
意於余情最密花落花開能幾日終不如孟郊韓愈
為雲龍上下東西不相失

戲惱王岳

春鳥啼春烟春烟醉春色花下彈琴酒微熱白日千
年秘丹訣誰憐曲未終花落絲絃折麟角煎膠不可
得綠楊香夢愁千結鏡奩絲碧經虫懸銀燭心灰泪
痕滅青樓歌舞艷名都年少雖同情各別暮雨淒迷
青鳥遲東風搖蕩游絲白雪羅小扇不堪書腸斷桃
根與桃葉桃根桃葉音塵隔露瀉瑤階踏殘月金鞍
駿馬洛陽陌玉樓十二珠簾揭鴛鴦野水空愁絕玉
樓十二神仙客

控郎馬酬別蕭茂材

控郎馬妾心悲留郎駐郎苦辭少年只願封侯早不

惜蛾眉鏡中老銀鞍金勒珊瑚鞭白水青山千里道
控郎馬郎駐鞍郎飲莫須盡酒醒郎衣寒郎心懸懸
五雲下教妾若為控郎馬馬蹄好向御街行蛾眉不
向粧臺畫

長相思

長相思相思者誰自送送上馬夜夜愁空幃曉窺玉
鏡雙蛾眉怨君却是憐君時湖水浸秋藕花白傷心
落日鴛鴦飛為君種取女蘿草寒藤長過青松枝為
君護取珊瑚枕啼痕滅盡生經絲人生有情甘白首
何乃不得長相隨瀟瀟風雨嗶嗶鷄鳴相思者誰夢

寐見之

瑶花花白色而變殘紅而碧

瑶臺仙子初相見迥立天風飄雪練東華夢破歸去
遲素衣總被緇塵染芳心不委春蝶狂水晶簾捲凝
清香胭脂洗紅留殘暈海雲剪碧浮霓裳揚州瑤花
舊同譜零落誰知到南土聞君愛花最有情亭臺五
月清無暑君不見花開今日多有酒不飲君如何

秋夜讀劉昕賓旭子夜歌因效其體賦三章

子夜歌歌聲苦短情苦多幾回待月月輪缺月當圓
處仍虛過銀燭窓深烟殘照玉釵半脫羅幃悄琵琶

學得奉君歡，祇今彈作思君調。
子夜歌，歌罷其如明月何。牽牛織女永相望，不教精衛填銀河。妾心本如秋月白，妾顏不共春風發。玉兔擣藥三千年，近見嫦娥搔白髮。
子夜歌，承君蛺蝶變花羅。羅衣秋來不堪著，梧桐樹上涼風多。銀燭作花好消息，又想歸期在明日。并刀不剪相思愁，相思誤盡曾相識。

桂林樵者為邊季節賦

月中桂樹三千尺，吳剛斫之不能得。桂林樵者今如何，萬頃秋山白雲白。樵者早年才力高，論詩自許詩

中豪前輩衣冠識，文獻中年詞賦含。風騷詞林藝圃渺無極，擷秀采奇隨所擇。袖中玉斧光芒寒，眼前不用生荆棘。舊來種桂高成林，團團十畝懸秋陰。明月流輝夜如水，西風吹夢香浮襟。客來有酒林下酌，酒酣共說歸樵樂。江上漁翁尋舊約，一聲長嘯山花落。君不見南山捷徑芳草迷，東山別墅寒鴉飛。明朝若遇圍碁客，柯斧爛盡君無歸。

哭胡洵 送楚金往峽江死焉

胡洵早年甚心苦，自云耻與諸生伍。讀書不免四壁空，世亂還須用吾武。拓戟開弓筋力強，一聞殺賊心

飛揚無官不得騎官馬
褰旗走下千仞岡
玉筍山前水流血
白日不回大刀折
勝敗明知不可期
廬陵要使多忠節
我來哭君淚滿衣
君母老大君兒癡
揚旂搥鼓徒旅去
孤雲落日精魂歸
丈夫樹勳當許國
一死如君獨悽惻
君不見武昌兵八千
盡向淮南看明月

曹居貞進士月下彈琴圖引

秋風蕭蕭秋月滿
林彼美一人匡坐彈琴
我一見之傷我心
問誰畫者天機精
碧天瀉河漢思入秋
冥冥不聞絃上聲
流水高山先有情
想當美清夜音響何

泠泠石泉寒激山間深
玉佩早朝天闕明月滿
洞庭白鶴唳霜飛
巫峽玄猿吟畫師真好手
神妙豈在論丹青
我獨不見薰風奏虞廷
螳螂殺心紛相仍
烟塵輦鼓迴風腥
我欲破琴絕絃獨携白石高卧長松陰
重為告曰美人兮
美人抱琴自古求知音

同李主敬賦周煉師漁樵耕牧詩四章章十二

句

子何為漁碧海之丘
長虹為綸月為鈎
六鰲昂首愁相向
眼看海水不揚波
扁舟穩繫珊瑚柯
邂逅徐家兒與女
拔劍屠龍共君煮
烟淡淡雨踈踈
人間彈鋏

食無魚吁嗟歸來乎吾與爾漁
子何為樵閭苑之東璫林玉樹朝露濃携斤盡剪荆
榛藪松下童子知何客長日圍碁者不得笑殺吳剛
愁滿霜千古桂枝碍明月石磊磊路迢迢人間飢火
燒心焦吁嗟歸來乎吾與爾樵

子何為耕瀛洲之曲玉山分雨秧苗綠蒼龍為耘虎
收穀炊烟晨起蒸為雲銀河晝洗塵沙昏釀成九霞
為君壽何必休糧苦長瘦草青青樹陰陰人間作苦
秋無成吁嗟歸來乎吾與爾耕
子何為牧蓬萊之麓自駕青牛度函谷鶴群鹿子還

相逐芝草松間長未齊紫苔竹下行迹迷南山群羊
化為石日斜歸去空無携水泠泠山簇簇人間岐路
往還復吁嗟歸來乎吾與爾牧

寄彭中和

君來桂樹林我辭桂樹去桂樹我所種高大已如許
六月濃陰繞茅屋不待花開可娛目駐屐送穿石上
苔題詩况有墻西竹小弟愛客開素襟兩載於君情
最深短棘本非鸞鳳宿長琴每作蛟龍吟君昔少壯
抱奇節荏苒風塵頭欲白道義交送久更真風月笑
談常自得江西詞賦多才雄知君已有中唐風汗馬

功名屬年少且可草服山巖中海棠牡丹都賞徧磊
落珠璣滿詩卷我獨天涯塵俗塵白紵每愁顏色變
丁寧小第母我違南阮雖貧頗自竒桂樹花開新酒
熟作書報我歸如飛

宋竹坡與余有延桂看菊之約竟不及赴賦樂
府一章以寄之

桂花開菊花開祗為花開自合來何須問酒盃 掃
蒼苔惜蒼苔風月應憐小宋才佳期待早梅

同劉伯貞題袁氏寓軒

窮窳携白日百年幾旦暮變滅乘化機萬物孰非寓

鴻濛不可超金石豈為固况茲無根蒂自當隨所遇
闢君闢西軒僑立延佳趣種竹新作林移花整當戶
蛛絲閃晴輝青松沐朝露久客賒酒易親舊時相聚
臨眺登崇岡故山渺何許月明金鳳洲夢魂自来去
少陵浣花溪管寧遼東路當其適意時何必皆吾土
干戈尚未已丘園安得住雪泥留鴻跡華表遺鶴語
茫茫宇宙間蟻垤終誰據我亦東西人長年忍羈旅
相送豈云遠即此馳音素須留酒一樽剪燭聽春雨
芹寓為安成彭伯圻賦

泮水過新雨官墻度晴雲於烏沐膏澤素心託芳芹

悅玩永朝夕采擷奚足云淪漪映寒翠光風泛微薰
野人分有限安敢獻大君聖化之所濡生意何欣欣
上林滿春色懽樂非所聞始知君子心希聖良獨勤
紛華念俱寂淵源思不群願言美真味盛德在斯文

心雲詩為羅宗仲先生賦

浮雲南山起還復歸南山騰騰駕輕風悠悠度松關
仙翁坐盤石心與雲俱閒冥觀玄化初吹噓膚可間
蒼龍變神化為雨徧九寰六丁封江湖空捲驪珠還
無心乃無物瑤琴相對彈

袁州有警不見舍弟銓消息

客行何倉皇挽衣問消息答云避寇初元戎先我出
峩峩空春臺列火半天赤雙龍蓄雲雨不救烟焰赫
城中千萬家大半殲鋒鏑前者見舍弟少髭而白哲
語語達人情謀身豈云失間道苟無虞生死候明日
倉卒棄吾兒君第我何及揮手謝客行奮飛恨無翼
復恐老親聳黃昏掩殘泣

壬辰閏三月初三日銓弟歸因錄其語奉呈楚

金諸君子

入門伴母啼出門聞鵲噪握粟卜靈龜之子歸已到
飢走涉一旬形容盡枯槁閭里共歔歔且慰慈闈老

問答憚語煩客滿始相告群寇窺無人鼠穴窮剽盜
承平宿將死戰守自顛倒九江咽喉地戎卒何草草
空春坐不救吾土敢相保惟當學義旂戮力事誅討
賊衆亂且囂一舉秋葉掃廬陵忠節邦足以正窮吳
鬱鬱英雄姿封侯何足道惟我最迂懶聞之展懷抱
振衣舞龍泉請作三軍導

重過胡洵宅

洵字宗美

入門見桂樹出門問桂樹桂樹相送迎主人竟何處
高葉鳴悲風疎花落殘雨獨立黃昏烟思遠天涯路

東王志元四首

山溪草屋寬溪迴樹陰綠脩脩圖書開斯人美如玉
芝草長未齊今晨雨新足開門掃落花坐石看修竹
天游邈難知避世何忍獨白雲歸未歸借我半間宿

又

戰塵暗南國白日無晶輝客行何慘戚途窮不忘歸
語及國家事老氣晴虹飛朝飲南山水夕採南山薇
嗟彼反側子捐軀逐輕肥寒餓良細事大義有是非

又

叢蘭被幽谷紫蕤含露滋山溪寡行跡甘同秋草萎
春風偶披拂遂為高人知高人不敬佩持以慰所思

紅塵紫陌間灼灼桃杏姿人心各有愛遺之亦奚為
又

海月上蒼茫照我中庭正香霧出簾遲微風動花影
泠泠綠綺琴拂拭塵埃淨一彈作新聲再彈成雅韻
三彈曲未終感激誰與聽肅衿遲子來無負春宵永

同周愷子諒賦老人會詩二首

時危親戚散况乃多賤貧賤茲老人會為樂難具陳
生子競榮達志養俱獲伸朝出共寮案夕歸為比隣
異姓歡愛洽不殊骨肉親起居迭相送悅愉盡情真
繫我豈無母半菽長苦辛願言敷治化枯槁皆同春

又

板輿度晴陌綵服迎香風今日良宴會慈顏和樂同
翠翹髮垂素錦筵花綴紅萱草春自好柏樹雪未融
縹緲瑤池母並集蓬萊宮自非有令子世亂徒漂蓬
於焉倘錫類頗勝平反功乃知晉潘岳閒居賦未工

送王鎬之邵武省親鎬字仲京

青青楊柳陌之子晨巾車去鄉不云苦攬轡馳渡駘
嚴君守名郡長懷音問踈再拜問起居千里歡有餘
綵衣捧綠酒紫袍映白須上言尚書軍聲振東南隅
下言大夫人高年色敷腴我雖邑子賤問信抱區區

官寮展良覲見子文采殊定云渥注水生此汗血駒
故家三槐樹功名遂良首願言慎徒旅令德忠孝俱

將歸桂林留別王志元劉象賢二首

耿耿念慈闈戚戚別親友屏營臨交衢淚下多於酒
去留兩不忘衷腸亦何有道誼托襟期取別無新舊
荏苒風塵中會面何時又好為頻寄書毋使長回首

又

志士慎唯諾况乃出處間白圭微有玷噬臍良獨難
富貴非苟得貧賤當自安干戈今若此誰測衰盛端
明當為遠別為君吐心肝願言保貞節溪居且加餐

和王鎬仲京自閩見寄兼簡歐陽文周

我惜晚聞道靈臺雜主客冥行不知津臨危始求楫
年邁悟前非端居寡娛悅聖賢迪遐軌中道豈容歇
駑蹇不受鞭出門有難色平生歐陽子肝膽無楚越
宿昔諧素心窮達勗貞節結交得斯人烏用復多閱
王郎晚相逢更覺才情別泳游文海中溪淺力窺測
欲振蓬萊音不同箏笛咽老氣蒼旻高雅懷秋水潔
蕪葭摧折餘幸托瑤林側柰何風塵起干戈積歲月
牛衣卧空谷長夜獨愁絕自君入南中扳附不可得
昨蒙求友篇情誼何淪浹恨無凌風翼就君共劇切

鬱鬱長相思秋夜幾圓缺持報愧琅玕永言銘厚德
濠石晚樵因簡李撫伯謙

出山復入山流泉遞迎送暝入黃葉溪濕分白雲重
棘荆攢迳危側身抱溪恐春花自芳妍春鳥自鳴呀
悠悠徒旅間何由免寒凍老親嗟我動歎息中腸痛
肩頰只自憐囊罄當誰控學劍惜已遲讀書亦何用
國步政艱危高官選才勇李君舊知己風格鬱清澁
光恠匣中龍文采雲間鳳庭闈壽且康甘旨日相奉
避地雖云同樂事誰能共知君懷遠畧臨機不妄動
戰爭柰未已發策必奇中何當展才力青雲縱飛鞚

聞龍興警報有懷歐陽奎

君子憂朝廷野人念親友壤壤吹戰塵金湯無固守
自聞消息來十日不飲酒生死不可知何論別離久
秉心思潔身飢寒且東走涉患始還鄉還鄉復何有
咄此將柰何迸泪空回首

悲廬陵

至正十六年丙申冬袁州兵逼城屯藤橋丁
酉正月義士廬陵陳瓘出屯城北之青湖二
月吳都事命兵校明某下桐江計事不報入
蘭溪台不至五月桐江李彬誅六月袁州兵

退秋明某歸遂以其屬屯太和之永和十一
月明某矯殺騎將林伯顏武端不問十二月
全叅政嘗其部將某某戊戌正月朔庚子戊
午叅政兵亂逐鎮撫吳林三月梁太守卒安
成兵自去冬侵掠北境旦暮至四月至桐江
五月初四退初十戊申分宜義士袁雲飛導
沔兵至桐江己酉義士劉照與戰于吉水之
灘頭庚戌明某以都事之衆降辛亥傳于城
錄事張元祚與捫監郡雅某降全叅政奔贛
裨將裨將降叅謀鄉貢進士吉水蕭彞翁死

之是日陳瓘召安成兵入城六月吳都事將
其屬居吉水之蘆兜此吉安再陷之畧也

峩峩青原山洋洋白鷺水炳炳照輿首磊磊足多士
四忠與一節流風甚伊邇徃者舉義旗事由匹夫始
連兵七年間省臣兼節制朝廷寄安危幕府保姦宄
勢驕改令畚反側久窺伺紅旂溯江來群雄盡風靡
今日賣降人昨朝清議子柰何英雄姿因之穢青史
朝為龍與虎夕為狗與彘流芳動百年遺臭亦千祀
嗟余父母邦何恐獨浚訾所恨寧馨兒磔磔不得試
賴有蕭叅謀殺身刷浚耻我欲裁白雲緘情問生死

哀歌裂肝腸臨風淚如洗

秋日撥悶

疎烟點寒蕪落日低茅屋
哭子淚未乾哭女聲相續
喪亂多憂虞生死何榮辱
獨憐白髮親無以娛心目
小姪早孳孳歲艱缺饘粥
數椽燹火餘鬱悠忍相感
余辜信有之天放亦云酷
桂樹萬黃金可玩不可蓄
貧富非我能出處誰卜買
臣非漢武負薪終碌碌
側聞西山巔薇蕨寒猶綠
倚樹盡軒楹願依白雲宿

送羅彥思往閩中候迎大父

天倫有真樂家慶傳新首
人生百年內於焉始為娛
爾翁老京國風霜搖鬢鬚
爾父奉慈闈干戈沉里閭
豈無饘與粥朝夕不得俱
眼穿孤飛雲心折返哺烏
近者消息真萬里神明扶
沉思供子臈內外懸君軀
投袂出門去父命何勤渠
朝迎暮望返少壯輕畏途
見翁問起居同舍相驚呼
孫已如翁長子應似翁癯
時危久離別會面當何如
歸期諒不遠春酒為君酤
再拜千歲壽親戚多懽愉
卿相何足道勝事世所無
願言慎前路明發毋躊躇

送別郭恒

作客似楊花送別楊花側
楊花風際飛那復計南北

曉棹洞庭波暮鐘廬阜月應笑山中人閉門頭雪白
夢覺

風舞參差花月照徃來道十載不相逢恍然共懷抱
計年華髮生何得容顏好近事維難知舊愁忽如掃
柰何微醉醒鷄唱心如擣情知夢非真頗恨覺來早
瀟瀟風雨聲離思滿芳草

題贈溪上翁

滄邑柘鄉宋氏

白髮溪上翁結廬溪上任風暄花滿衣水暖魚吹絮
隣曲相邀留酒酣獨歸去忘却釣魚竿掛在垂楊樹
和郭恒

罷釣澹忘歸看花北山谷不知春事深黃犢無人牧
對酒斫白魚題詩滿青竹隣翁記疇昔笑我剡節目
苟免征戰危敢避泥途辱明日有餘樽候君到溪曲

大雪中羅伯英見過

大雪破絮溫高眠及辰已忽聞扣柴扃不語知奇士
獨行何飄翛海鶴乘雲氣玉界瑯田中神仙足風致
云何剡溪船高興一時廢貧家飯脫粟菘韭自無備
且復倒餘樽燎衣語文字聖賢去我遠摩茲糟粕味
每當得意時何如卿相貴人生俱有營俯仰期無愧
冠鄧列雲臺嚴陵釣江涘不聞青史間馳議相軒輊

嗟我窮巷子賓客少能至况茲風雪中
塵塵見君意感歎不可留臨分更攬袂
回首北山巔松柏鬱蒼翠

甲子

淵明賦歸去正合書義熙衣冠晉江左
寄奴吾何知春秋乾侯筆凡例日星垂
誅心雖援微臨難將安施乃知書甲子
當在永初時古人日已遠澆風日已漓
空餘五柳樹蕭瑟西風吹

語童子

童子携春衫好去換春釀鄰翁來相過
林泉共幽賞移席近花間題詩在竹上
垂老惜交情毋令默惆悵

別羅昶

少小涉憂患未老容鬢改任情墮踈慵
事往不可悔旅食玩炎涼屢空蠹光彩
出門誰與言見君獨長嘅幽蘭閔秋香
空谷若有待霜露淒以零明日誰當采
山鷄囚樊籠羽翮日以鍛見者不憐傷
雲山渺何在今人不我期古人不我待
琴聲發鏗鏘劍光吐竒恠得奉君子歡
綢繆涉三載去去憐此辭良悟何由再

與客談鄒超因賦

鄒超一白丁凜凜節士操揮戈回白日
日沉戈亦倒使其綴朝班不愧國中老
遂成薛侯名宇宙忽新造

煌煌天使星輝光照窮吳老守衆所推
溪意完城堡判筆負所期丹心向誰告
城中百萬家稽首忠厚報薛侯令有孫
家聲宜自保鄙超不再見耆舊傷懷抱
臣各為其主生死盡其道我生百年後
俯仰憂心擣側身望青原寒烟黯秋草

齊居苦熱以大盆盛水置前坐卧對之心目清

朗是亦用水之義也

炎埃不可掃何以清我懷銅盆沒寒井捧盆置西齋
吐嗟一室內澆漾江湖開風漪浮席動雲影入窓來
一清泚衆綠涼意浮庭階雖無瓜李設即此懽相陪

來客盡君子談交性所諧嗟彼附炎者長路迷黃埃

早秋陪楊和吉曉登前山望桐江

白鶴導晨送涼颺起林秒振衣凌高岡極目窮幽眇
蕭蕭草樹秋歷歷人烟曉依微玄潭觀群仙在林表
下有塚纍纍世事誰能了桐江滙章水晴漲何渺渺
曾不瞬息間一帶縈沙小無恠豪傑區烟蕪怨啼鳥
盛衰兩相乘玄悟良獨少君今脫塵羈相送得閒眺
題名刻石苔借蔭懃叢篠白紵含餘清稍覺心情悄
山市門初開飛塵已紛擾

閏七月十六日山中早發

宿雨剝微涼游雲弄新旭客子將出門陰晴苦為卜
驅車涉前途今夕投誰宿雨久愁躋攀日長畏炎燠
使無塵故縈在家貧亦足天意詎得知疇能遂所欲
俯看山徑泥來往滿新躅

秋夕王楚善過宿

片雨洒空庭梧桐響殘滴窓戶涵清風孤燈夜窸聞
渺懷平生親睽違不相識公子幸過送為之長歎息
意曠塵慮空語到聰明入山逕披榛蕪晤言永今夕
物變心自傷事往嗟何及遠大與子期無踵炎涼迹
和宋時舉見寄

浮雲不為雨出岫期無拘蒼龍偶借勢影迤隨風除
懸知市朝上不似山巖居送客限門外嗟彼馳交衢
為農甘沒世何必衣冠儒君居崆峒上自與人事睽
清高浥沆瀣念我纏塵區托交匪朝夕無論出處殊
山水有佳趣且此寧君軀

聞周子諒訃

丈夫志耿介臨別仍傷懷况茲泉臺路一往不復回
憶昔送君去知與素性乖微官淹歲月悲風送天來
老淚為君盡寸心為君摧士林黯憔悴功名安在哉
始知稽阮輩甘心沉酒盃

十二月初三日大雪與同宗弟文昌飲諶塘忽
落一齒遂賦

垂老驗盛衰深憑齒與髮髮白歎吾衰齒落哀已極
利害髮不任養生資齒力無問藜與藿得以娛朝夕
次第相動搖世事嗟何及吾舌雖云存苦乏儀秦術
脩短未遑徵得酒姑自悅天公構巧思六花舞飛雪
倏盈還忽消鴻爪無遺跡古來豪傑士文字畧相識
是非紛與奪視今如視昔寄言後來者人生當自適

峽江道中

去鄉已百里避地何時轉歷歷墟里殊稍稍語音變

妖狐似鬼啼落日人煙遠遙睇層峯高平地是交戰
流水為誰哀嗚咽相迎餞

過羅仁達別墅

架石束飛濤結廬枕幽谷縹緲紫翠間孤松立雙鶴
主人坐清陰候我渡溪曲盤渦搏落花茶煙出幽竹
相對澹忘言月明山下宿

二月十八日隴洲夜渡

江波展素月好風吹衣中扁舟動寒碧恍朗開金鱗
心清挹沆瀣神遊挾仙真獨恨迫兵火倉皇來問津
豈不欣所遇終焉啣苦辛君王甚神武何時息戰塵

歸舟如到此月色應更新為君換美酒長歌酹江神
送別李騰還鄉
別離古云苦况值兵未休慈烏夕反哺蝮蛇寒出遊
料事每成錯去住難自謀東風捲飛雨添我雙淚流
憑君見親舊道以情悠悠

送人之臨川

聞君適臨川臨川幾時到日色江上舟雨香沙際草
側聞吳先生掛冠已云早邂逅道溪期故山白雲好
賦丁氏悠然齋兼呈羅宗仲進士

滄山西來森萬木幽人結廬枕山麓入門所見勝所

聞先生弟子皆無俗芸草晴香攤古書竹簾晝永閒
棋局陂水門前春浸綠一支分入清池曲搖曳瑤絲
雙屬玉意閒似與忘機熟清曉開門掃落花細雨分
根補秋菊鶴歸帶得南山雲夜來共就簷端宿溪魚
入饌白如銀春酒醱醅香滿屋客來留飲醉為期人
生樂在無拘束知君心事媚幽獨不肯低頭狗榮辱
感君於我情最深每有篇章親手錄羅浮老仙卧雲
谷為問淵明舊芳躅相送更作秋風期借我高齋看
修竹

環山亭

袁氏為奉親而築

環山亭上看山好我獨愛君親未老築亭當日為娛
親不計春歸與秋到捲簾雲拂老萊衣折花香撲崔
卿帽四面煙鬟翠相抱中峯屹立當時吳蒼松老柏
鬱難攀白鶴玄猿共幽討恠石槎牙獻奇寶澗水冷
冷入琴搯鄰叟時邀共酒杯諸孫日遣傳詩草婉容
愉色春融融稍覺龐公近枯槁華萼弟兄永相保金
谷賓朋何足道百年父子樂且真始信人間有蓬島
我欲訪君待秋早楚江釀酒空傾倒寄書更約安期
生携來海上如瓜棗

黃氏容安樓

君家高樓高百尺樓間把酒無虛日極目欲窮千里
心誰謂區區僅容膝捲簾半空雲氣入孤鶴長鳴楚
天碧醉拍闌干呼月來萬壑松風夜吹笛天上玉京
十二樓群仙不帶人間愁曉飛霞佩來相訪携我共
作丹丘遊今日之日君我留為君題詩樓上頭笑指
樓前大江水古今人物共風流

題劉文周愚直齋

先生結屋龍湖上大書愚直懸齋榜松風夜挾秋聲
高山雨晴添湖水長一窓燈火聞書聲洞視太古凝
幽情商周以前是人物儀秦而下非功名古人今人

各如此先生意向如何似高風誰學柳士師夜雨閉
門魯男子先生長笑心自閒葛巾草服開松闥寶珠
光燄照雲水好詩題徧龍湖山我遊梁楚號狂客飲
酒呼盧都不擇鳳兮鳳子歌思哀老去人間拘小節
甚欲相從讀舊書何時下榻容安居是是非非吐心
膽先生真是古之愚

賦清溪

清溪之水抱幽谷盤渦細浪相逐感半篙晴日蕩金
鱗一帶秋烟溜寒玉溪上仙翁絕塵俗開門俯溪飲
溪綠白鳥飛來明鏡中垂楊鎖斷闌干曲窈窕春花
亞修竹修竹何人共碁局紫蘿為蓋草為褥如輕川
首懸一幅嗟我早年厭羈束五湖風月醉心目祇今
是處沸鯨波把釣送君事亦足

題周季彬竹洞

周郎早歲才名重華屋連雲接飛棟却耽野趣愛幽
棲種竹迴環結成洞洞中坐客雖不多洞前車馬長
相過微風敲玉鬱清爽濕烟團翠涵清和石峯嵯峨
儼賓主紫苔帶得春前雨翡翠晴連覆酒盃琅玕日
長添詩句簟紋如水形神清萬葉為屋竿為楹朱光
不到失昏晝六月鬢鬢聞秋聲嗟我村居逼樵舍此

居稍覺情緣寡正擬相送共笑歌不緣一看忽忽借

題李次晦溪山間

往年走馬遊長安杜陵常曲花未殘玉堂天上春夢
斷拂衣歸去溪山間溪山之間溪且好主翁見客開
懷抱花氣晴熏白紵衣波光滿浸紅雲島長松吟風
晚冷冷松下酒醒彈瑤琴松聲琴響自相和消盡人
間名利心臨溪結屋看山色山下行人招不得猿笑
烟溪掛紫蘿龍窺水冷吟秋月主翁心閒一事無諸
郎文采珊瑚株南山射獵非所好芸草懸香惟讀書
竹迳曉開邀二仲白鶴相迎復相送風月西窓詩料

多酒熟何時添我共

題鄒茂才讀書處

鄒君昂昂二十餘世味不好好讀書今年新作讀書
處青山白雲閉盡菑屋前老樹滿千株濃陰晴抱溪
光虛架上牙籤醉白魚窓前鉄硯愁蟾蜍水沉香裊
銅花爐竹消滴露自研朱十丈風埃葦簾隔三更秋
雨青燈孤吐氣欲吞餘子輩冥心獨遊太古初門外
來者皆吾儒羨君文采時時殊聖經賢傳多貯儲大
義所得無拘拘臯夔稷契何所讀簞瓢陋巷誰與居
出門千里慎所趨會看風翮排雲衢我今老矣慚不

如贈君又無明月珠為君長歌敲唾壺

羅友諒靜樂園

老大為園殊不惡人間富貴浮雲薄官曹賭命擁輕肥不似先生靜中樂靜中之樂如可用鶯啼燕舞嬌春風貯酒經年偏為客雨餘剪韭寒薦菘靜中之樂不可盡游絲裊空碧桃謝滿前詩景取次收諸孫捧硯花陰寫午窓客散還復眠長年習靜如得仙投壺聲悄停臯箭篆香灰冷消殘烟我居近市厭囂聒老圃荒涼懶耕作朗誦先生靜樂篇白鶴風高入寥廓

秋塘曲

高荷擁翠秋滿塘花開不見聞花香老魚吹波紫萍碎花下飛起雙鴛鴦鴛鴦相逐低迴翔藕絲易斷愁心長玉笋不彈轆轤悄一簪華髮凝秋霜

溪西靜者為安成周鼎傳賦

先生下筆妙天下好泛天上騎天馬却將富貴等浮雲自號西溪之靜者溪西池館門常閉綠陰滿地清晝閒碁聲不聞賓客退先生夢到希夷間世上利名爭賭命誰似先生獨能靜心涵太極易書存吟到盛唐詩律定我今結屋萬山中出處似與先生同南州久已無高士牀下終期拜德公

水山謠

黑風顛顛海波立
冰山嵯峨聳千尺
樓觀晴連蜃氣
高金銀夜貫虹光
赤上有異物騎於菟
左手鞭熊右
麾貆彎弓射天鬼
神泣憑陵殺氣搖
荆吳狡兔爰爰
何所得百計
穿窬作三穴
父老相逢不敢言
夜對妻
孥淚成血
一朝白日中天開
冰山融液菲人推淋漓
后土滿泥滓
笑聲變作啼聲
哀前者已傾
後者踣出門
却恨乾坤窄
秦關逆旅商君愁
楚國飛車觀起裂
早知冰山不可保
何不委身平地好
送今寄語問津
人風雨西山薇蕨老

陪歐陽奎文周秋夜宴集

高陽酒徒厭拘束
洞簫清夜吹寒玉
月影微生滄海
波秋聲瀉入南窓
竹主人好懷為我開
前除掃葉剌
蒼苔移席傳呼秉
銀燭飛觴不惜空
金壘百年交契
亦無數且得共君
長夜語蘭苕翡翠
自春風延平劍
合蛟龍舞我家茅
屋江之西門閉不
聞車馬嘶携書
樹底騎牛讀得句
樽前洗竹題酒酣
拊缶山谷響聊
共漁歌荅樵唱
此時半面未逢君
何乃見之輒稱賞
論交不論淺與深
丈夫一語輕千金
白璧無瑕人所
貴青雲有路吾何
心簫聲不斷酒如
注泓下龍吟月

涵霧仙人招我歸去來雲車相候蓬萊路

美人折花歌

美人折花粉墻曲花前背立雲鬟綠乍愛薔薇染絳
霞還惜海棠破紅玉素手纖纖羅袖殷心情凝想金
刀寒低枝未吐精神少高花開遍顏色殘花刺鈎衣
花落手草根露濕弓鞋綉紫蝶黃蜂俱有情飛撲餘
香趁人久情知人老不似花花枝折殘良可嗟明朝
棄擲粧臺側綠陰青紫愁天涯

送遠曲

為君治行近一月今晨竟作匆匆別枕邊紈扇鏡中

花一時盡變傷心色妾雖不見邊城秋君亦不識空
閨愁憶君便如君憶妾淚豈為它人流才貌如君
長刺促少年心事何時足歸期未定須寄書誤人莫
誤燈花卜

悲武昌

武昌兵甲雄天下王孫節制何為者白馬將軍飛渡
江壯士彎弓不敢射玉船未過鸚鵡洲紅旂已簸黃
鶴樓美人散走東南道一絲楊柳千絲愁戰鬼啣冤
夜溪哭王孫獨在淮南宿淮南美酒不論錢老兵猶
唱河西曲九江昨夜羽書傳九江太守愁心懸烏淥

將書報天子，哀哉不識顏平原。

贈周郎

白馬渡江赭衣舞，青春煞氣吹吳楚。豪傑如雲起義兵，盡說周郎才且武。鏃金伐鼓駐江滸，麾下健兒猛如虎。大刀照日開雪光，飛鏑穿雲落鷗羽。亦知困獸死猶鬪，轉戰大呼髮毛豎。馬鞍曉被帶冰霜，刁斗夜鳴雜風雨。黃河不見官軍渡，青天白日丹心苦。國家養兵八十年，不斬蛟鯨伐狐兔。自非忠義激心肝，誰肯艱難越深阻。昨者懸軍大捷歸，聲名歟起元戎府。府前獻俘揚虎旂，府中把酒歌都護。江南布衣有如何，足數

少年行

西家少年茅屋裏，床擁牛衣瓶貯米。一朝販鹽多白銀，妻學宮粧兒學跪。甕頭新酒鷺兒黃，無時殺猪宴隣里。酒邊自歎還自矜，眼前華屋連雲起。指似中男眉目強，早教讀書結豪貴。黃金直可賄公卿，莫遣終身在泥滓。東家老儒笑無計，一窮到骨門長閉。百年榮悴那得知，世情直付東流水。

郭恒惠牙刷得雪字

老氣稜稜齒如鉄曾咀奸腴噴腥血倦游十載舌空
存欲挽銀河漱芳潔南州牙刷寄來日去膩滌煩一
金直短簪削成玳瑁輕冰絲綴鎖銀駿密朱唇皓齒
嬌春風口脂面藥生顏色瓊漿曉嗽凝華池玉塵畫
談洒晴雪輔車老去長相依餘論於君安所惜但當
置我近清流莫遣孫郎空嗽石

贈彭將軍

將軍昔泛布衣起便欲賭命報天子里中父老得開
顏刺虎斬蛟良細事幾年汗馬鏖戰塵君門九重誰

得陳羽檄飛雲白日暮牙旂捲雨滄江昏中書大臣
擁貔虎吐氣如雲蓋南土豫章城頭鳴老鴉匹馬夜
出杉關去楚山蒼蒼楚水清草莽之臣何重輕但得
嚴君脫虎口皇天后土相知心誰想長材不終棄控
搏造化真兒戲東隣早結丞相懽種瓜不到青門地
君家屋前山水幽正好歸來尋舊遊座上衣冠戲綵
日窓前燈火讀書秋我欲送君語疇昔悠悠世事嗟
何及滄波東逝魚西飛獨振布袍三歎息

負薪女

山下女兒雙髻垂上山負薪哭聲悲辛勤主家奉晨

炊主翁頭白諸郎痴干戈未解骨肉離生來不識妍
與媼長笑鄰姬盡蛾眉金屏孔雀何光輝琯弓羽箭
來者誰綠楊終日青驄嘶人生年少如駒馳鴛鴦翡翠
皆雙飛愁思百結心自知負薪拭淚背人揮黃昏
四壁寒螿啼

和羅貞仁達見寄

紛紛世事何為者殺氣騰空龍戰野萬國瘡痍未得
瘳十年奔走終無暇痛哭呼天晝杳冥淚痕血點布
袍腥愁霜逐日催人老厲階在昔知誰生憶昨先皇
振天怒盡四海外遵王度官曹裘馬連青雲父老謳

歌足春雨我自甘為樗散材石田山下鉏蒿萊骨相
判知無肉食對客長笑心悠哉先生未肯老丘壑雲
海蒼龍奮頭角碧桃紅杏皇州春緣誰竟負看花約
空谷著書追昔賢文章落手人間傳長風吹雲出山
去使我不見心懸懸出處情知各有志故舊何人共
心事離別中年自不堪芳草閒愁滿人世海波幾許
成桑田麻姑消息魚沉淵小山桂樹秋風老待君歸
去知何年

寄李尚文少府兼簡周仲元

蓬萊歸路渺何許美人相思隔烟浦青鳥飛來雨意

遲黃鸝啼醉花陰午江邊釣石甚奇古一絲柳風獨
延佇囊罄久無酤酒資詩成何得驚人語李侯金閨
聲價高往年意氣凌吾曹官舍臨湖懸綵捧酒盃勸
客濕宮袍不擬東籬種秋菊欲送上苑醉仙桃寧知
淮海風塵起黃鶴委翅歸蓬蒿去年東走共顛倒茅
簷寄宿憂心擣九月締衣敵早寒萬事不如歸去好
拾薪煮雪我常負掃石卧雲君計早古人成敗每輕
之及此始知難自保近日携書尋舊遊江上孤舟滿
載愁偶見周郎共樽酒一談一笑何風流主賓二妙
不易得我欲送之長滯留相思且付楚江水江水不

盡情悠悠

題秋山風雨齋

平生最愛米家畫君之此圖妙天下鳥分歸路雲不
開樹壓懸厓雨如瀉倚江茅屋何人住蘆竹蕭蕭出
無路似我還山烟雨中愁來只讀秋陽賦

同羅伯剛贈棲碧山尊師

子真騎鯨上天去山中碧桃開幾度昆明灰盡始逢
君到今獨守燒丹處聞君早歲神骨清手援北斗掛
中庭銅仙夜送玉盤露孤月炯炯秋冥冥碧山清高
隔風雨不省人間暗塵霧酒盃春綠浸瑤花棋局午

陰團柰樹我思子貞不可扳欲往送君勘大還仙人
不借綠玉杖只隔流水行路難行路之難今最苦山
鬼跳梁一足舞蒼精隻龍閔神光待君不來白日暮
何當為啓松筠關一洗塵土開容顏鶴背天風甚安
穩携我更上蓬萊山

贈別羅庭植

驂騑不受庸駕羈志與千里風雲期才傑每稱天下
士慷慨必展胸中奇十載君歸卧雲島功名歲月閒
中老燒丹永夜紫霞飛問字無時綠樽倒抱琴正好
聽鳴泉明朝又買西江船角引曉霜凝別思梅披晴
雪照離筵吳山楚水多芳草黃金臺高幾時到必逢
豪傑語襟期白髮誰憐長遠道人生富貴各有時朝
陽鳴鳳梧桐枝醉解吳鉤贈君去歲云暮矣歸母遲

送軍別

將軍披甲控紫騮美人挽轡淚流六月炎埃人命
脆軍期稍緩君須留彼為兄弟此為仇朝為公相夕
為囚歲歲年年苦征戰黃金誰足誰封侯煙塵暗天
南北阻英雄盡合回田畝當時兒戲應門戶不謂虛
名絆官府馬鳴蕭蕭渡江浦重喚奚奴再三語將軍
臨陣子為御莫把長鞭鞭馬去

寄送弟鐸及弟銓

牡丹臺前春色滿杏花初開柳芽短霧氣撲簾翡翠
寒池光盪日鳧鷖暖好花時節俱在家銀錢買酒不
用賒長生共祝千歲壽遠信相期八月槎烹鷄斫魚
宴親舊弟也甚恭兄甚友功名好在太平時骨肉獨
完雛亂後蹇余抱病向天涯每逢佳節長咨嗟蘇秦
六印終何益半畝還須學種瓜

和荅銓弟

弟云在贛日有誦爾詩兩辱問起居

別來兩見春日滿愁思誰云春夜短十八灘頭鳴棹
歌吳姬勸酒銀瓶暖中江開帆先到家意濃不計歸
程賒但云老兄久埋沒詩句何得隨飛槎諸公傳誦
無新舊相憐似是平生友事業青雲如鼠肝文章白
髮羞牛後長年凍餓茫無涯不敢仰天生怨嗟先生
歸去且種菊詞客愁來空饅瓜

題楊和吉灤京詩集

鈺也不識灤京路送君幾向灤京去灤京才俊紛徃
來好景惟君獨能賦大平自是多佳句况逢虞揭論
心素金魚換酒謫仙狂彩舟彈瑟湘靈助豈知歸去
烟塵驚山中閉門華髮生雲氣蓬萊心未已夢中猶
在東華行貞元朝士幾人在少年詩史千載名西雲

亭上何日到為君舞劍歌灤京

猛虎行

猛虎長嘯風滿谷十載山中往來熟朝瞰牛羊暮殺人
耽耽不畏弓刀逐山翁死後空茅屋山下行人早
投宿妖狐憑威作人語跳梁白日欺樵牧南來壯士
怒相觸彎弓射虎穿虎腹閃爍雙睛甘就戮髑髏作
枕皮為褥人生何必書多讀能事自足驚殊俗何當
更斬長橋蛟老夫雖死關心目

贈劉子倫

廬陵周愷文章伯語語談君不易得嗟余終日走風
塵到今未覩真顏色聞君早歲抱奇節胸中磊落大
平策玉龍霜冷光欲飛蒼隼秋高影孤掣交游四海
多才傑自合貢之天子闕綵筆題詩衡岳雲畫船過
鼓西湖月衣冠王謝自風流賓客秦黃最超越往年
仗劍奮忠烈戰袍紅濺猩鼯血草檄未吐陳琳詞種
柳已近淵明宅酒酣氣漲激天風一聲長嘯層崖裂
登山臨水澹忘歸聽雨看雲頗愁絕茫茫世事應難
測英雄莫遣頭空白寒盡春生剡雪霜海濶天高排
羽翮何當携手銅駝陌蓬萊群仙朝帝側醉灑溟波
鱗六鰲老懷浩蕩送君說

滄洲灌夫詩為周子諒賦

往年曾踏滄洲路滄洲仙人留我住紫霞裁剪成春
衣到今掛在珊瑚樹十載人間走塵霧惟愛周郎讀
書處雲氣寒溪連竹松江波晴漲搖窓戶清曉中庭
遺鶴羽太乙青藜夜相語晚菘春韭東西畦鳥啼桑
陰日當午浦雲分送踈踈雨抱甕歸來不知苦嗟我
已負滄洲期羨君獨得滄洲趣江山今古武陵源姓
名伯仲蘇公圃畦外有田多種黍長使糟床壓香醕
招隱先須招我來到門不用分賓主

葵花歎

朝見葵花長歎息暮見葵花重於邑白日携光萬彙
蘇寸心炯炯誰能識蠟光膩粉花正開翠袖捧出黃
金盃再拜君王千歲壽六龍迎駕扶桑來朱門厭逢
車馬客移花遠置山巖側不辭辛苦灌葵根遮莫浮
雲翳空碧

寄友

東岸桃花西岸柳來往扁舟共杯酒去程易遠情易
踈長亭落日空回首南山山下黃菊叢采采寒花霜
露濃蝶恨蜂愁時節去老懷且復相為容風雨昨朝
籬竹倒牛羊亂蹴荒山草草木無情難自保人事悠

悠何足道黃金多貯交情好

呈羅伯剛文學

正月初四日伯敏兄見過我桂樹林辱拜老親語及先舅志行房下事重增感哀先舅諸子姪留江外者存亡雖未可知而其田土在鄉里者多寡宜有可考且韓謚祀克神恐不歆鄰於若敖生者何忍僕謂宜白諸親者尊者奉靜季翁父子之主遷于羅氏祠堂而籍其田土之入以助歲時之祭甚義舉也俟江外者歸完歸外府又何難烏僕侍老親貧甚

無能為役謹賦長句以呈惟伯仲究心焉

羊郎不過西州路痛哭當年獨何故甥舅深情江水長今我思之更愁苦葛山老屋依巖樹杖屨往還經幾度池光凝墨草帶垂正是仙翁讀書處仙翁騎鶴渺何許零落殘雲春景暮不消鬢雪添眼花到今長者傳佳句志行有詩云膺盡未消頭上雪麒麟高塚舊松楸燕子他家好門戶嗟我重来淚如雨早時鬢髮今垂素再拜中郎問家譜封胡羯末俱清楚乃知喬木盤根深萬葉千枝承雨露澄清淮海藉英雄亢宗事業寧無補夜讀群書霜月明秋懸復劍蛟龍舞

振耀家聲文且武綿綿萬萬江之澣印山祠堂今誰
主仙翁配食神靈聚豈無他人我同祖蒼崖勒碑照
千古

寄羅惟巽 善製筆

四年不見羅文學綠鬢朱顏宛如昨酒杯春滿聽啼
鶯琴響夜寒彈別鶴鶴飛冥冥遡寥廓仙人遣送長
生藥丹砂九轉飛靈光玉虹白日穿林壑豈無蹤跡
到城郭詞林近日傳新作待月光分荷露圓掃雲晴
帶松花落高懷自是貯冰清而我胡為困塵濁愁心
千尺游絲懸俯仰交情誰厚薄白髮為儒世所輕臨

池學書意蕭索聞君近有山中約狡兔何時當就縛

題鄧家婦王氏詩卷

青原之北書臺東高官厚祿多才雄一死獨稱鄧家
婦立身豈在文章工黑風吹沙舞魑魅劍花凝碧血
流地紅顏薄命誰不憐高風能使男兒愧鄧侯莫傷
鸞鏡空厚夜招魂歸故宮結髮深恩不相負今日始
見脩齊功茫茫世事東流水鄧侯容髮今何似鬢宮
有井井有人重到讀書須向此

和酌歐陽伯庸

往年讀書竹溪處君家叔父相賓主一門群從君最

奇賦詩已有驚人句
秋高沆瀣瀉金莖
日迫瑤臺森玉樹
邊烽飛度吳江浦
燕歸盡失舊門戶
十五年間百憂集
相逢不敢訴艱苦
昨者見君俱老蒼
形容雖變氣如故
青眼惟逢舊客開
素衣不受緇塵污
松下長琴按新譜
流水高山必自語
聽者不知復不顧
始見高人有真趣
乃仍食貧忍羈旅
俯仰詞林誰比數
射工伺影江波暮
長日閉門傲寒暑
雲松千尺冥冥風
野桃三月瀟瀟雨

題龍湖小影菴贈劉文周

龍湖春水浮翠烟
柳絲千尺繫漁船
漁歌唱得歸來

篇龍湖秋月浸寒玉
桂花香壑樽中綠
琴聲彈作高山曲
斯人何似似飛仙
是誰妙手分清妍
人間今日畫菴傳
薜荔分陰經茅屋
露瀉空青沐松菊
白鶴歸來晨自沐
蒼龍玩珠湖水寒
虹光飛逗霜毫端
賦詩寫徧青琅玕
世上功名舞豪傑
白髮青衫腰屢折
誰肯山中採薇蕨
君心直與古人期
朱顏綠鬢人莫窺
如何畫史能相知
彭郎意匠自奇絕
使我一見神飛越
小山招隱歌三疊
我家更在溪山深
彭郎何日能相尋
畫我高秋桂樹林
桂林近接龍湖上
與君杖屨共徃還
何須更看青松障

畚龍叔起

早歲功名望吾子寶匣倒流三尺水一朝騎馬稱將軍鄉里小兒盡風靡詩句烏絲寫兔毫除書紫泥印宮紙移席花間待客至俸錢沽酒日餘幾材傑大用當有時長想風雲平地起事有不然待消弭中朝達官忽至理塵飛戎馬塞江淮日落妖狐鬪閭里東西奔走十六年今日見君雜悲喜一飯不肖蹴權門獨惜交情保終始作詩寄歐思不群大音洗我箏笛耳我欲煩君重見歐着身更好山巖裏

送劉掾歸休

人生無如食祿好何似逢萌掛冠早山林朝市將無同英雄不向塵中老聞君拂衣歸故林往事欲說誰知心一代文章塵土夢百年富貴浮雲陰君今住近青原下庭竹窓梅絕瀟灑幾回清夜夢故人故人天上騎驄馬丹心仰天寒冰清白髮照鏡秋霜明曉圃鉏雲種蒼玉春山斲雨尋黃精瓜田新得東陵種襟期還與東陵共門前賓客送去來但令玄鶴司迎送我不識君心煩勞滿前出處君獨高側身西望長歎息懸崖老樹風蕭騷

座客談仙

彩霞麗空覆蓬島瑤樓畫鎖春風好海波不動羽輪
輕霞佩雲裾自顛倒徐郎消息真未真如何却許童
男到一盃曉露啜瓊漿兩袂天香拾瑤草不省仙宮
日月長但憑青鳥歸來早秦皇漢武空復情蕭颯麻
姑霜鬢老

送羅秀賓之江東兼寄劉潤芳兄弟

劉於余為近憐而客於饒與吾家諸父兄弟
俱相好壬辰之後久不知消息近年聞無恙
而故鄉有不堪回首者故末重特致意云
十載山中投禿筆長揮老淚送行役今日緣君始放

懷為作長歌寫胸臆君昔讀書三百篇早期擢桂秋
風前驂騶健步無由騁白鶴仙經得秘傳竹筇行遍
吳雲白地利天時細窺測丹心欲拯世間貧厚澤每
沾泉下客辭家千里游江東壯年豪氣飛晴虹大府
禁酷若為別奉一盃水情無窮吾鄉劉郎好兄弟為
我殷勤致深意芳草烟荒同水廬長松月冷龍湖地
東郭老生廢讀書桂林雖好顏色無人生萬事還鄉
好畫錦何時照里閭

楊和吉西雲亭賞菊和韻

西雲亭上酒初熟西雲亭下滿秋菊主翁把菊飛酒

觴綵箋自寫陽春曲舊觀菊譜不知名今日按行心
始足靚粧洗粉舞霓裳醉色扶嬌剪紅玉就中一種
菊之王高花獨號御袍黃縹緲翠華下南苑玉環飛
燕參翱翔誰言老圃含淒涼雅懷不受春花香地偏
佳色承曉露天清老氣排秋霜府司伐木震山海嗟
爾寒花獨光彩長歌把酒酌淵明歸來三徑今何在
座客酒酣多氣槩我獨看花發長嘅晚歲更為松竹
期他時莫逐蕭蘭改

桐江宴集和周子諒韻

岸中長嘯吾與君讓君筆力飛春雲蕪葭枯折吳江

濱芝蘭却許濃香薰今夕何夕歌聲聞江山重到吾
已老慚愧詩成瘦如鳥座中少年美詞藻琪樹交花
照晴昊懷抱一時盡傾倒玉瓶行酒盈如飛爭雄得
雋酒滿衣持觥御史令莫違斫魚烹鴈頤指揮荊州
吾土還相依江上雲荒月欲爛客囊空貯閒愁滿不
謂相逢重展轉交情豈必論淺淺黃鵠一飛天地遠

荅宋時用韻

朔風吹裂霜林錦敗葉蕭蕭滿山迳鴉啼落日繞空
巢鴈度愁雲蕩孤影思君不來心炯炯白鶴傳書致
三請想見雲間騎鹿歸坐俯清泉滿清聽喬木千章

拔地高危樓百尺臨風迫壯顏如玉紅光肥閒意看
花綠陰靜昨來訪古鳳凰臺二水三山入高詠李陽
魯奮漚麻拳毛生自脫囊錐穎駉駉虛空不足騁且
復滄波理烟艇歲月悠悠付笑談水去雲飛兩無競
長琴橫膝松風鳴溪巷閉門苔雨淨秫田秋熟新酒
香第勸兄酌惜光景問余別恨如水長幾回空發剡
溪興坡上竹翁煩問信何得風波起督井空山歲寒
冰雪盛凜凜蒼松千尺勁

送宋仲觀迎親江陵

戰塵飛空暗南北出門每恨山河窄况復荊州千里

遙君家嚴親久為客天高鴈杳音塵絕十七年間愁
百結昨者忽傳消息真健步如仙髻如雪上堂白母
喜欲顛明朝便買西江船奉迎歸養無不足高官可
棄金可捐東隣失子西失母君家具慶寧非天別君
豈必送行曲望君却賦歸來篇舊聞荆襄樹旗羽客
行不免多愁苦嚴君能保千金軀豈無歸夢到鄉土
老大還家樂且閒溪柳山花摠如故君今去去須早
歸白髮慈親倚門暮

代送安成潘判官

玄雲夜開景星現野田秋枯甘雨遍潘侯為政今若

茲在於賤子何由羨安成昔變虎狼都黠者為鼠痴
為魚西風落日一回首慘淡百尺書臺孤萬馬南來
如電掃風俗只今還再造遺民一二盡瘡痍潘侯輟
哺傷懷抱朝馴蛇虺歸青山夕抱赤子衽席間一朝
威武收功易三載撫字推心難潘侯報政赴京國不
敢含啼卧車轍再拜君王願借恂重來早建黃金節

古劍歌為李伯謙賦

先生重劍如自重藏之溪山不輕用寶匣夜開紫電
飛滄波曉淬龍光動干將湛盧不易求英雄今古良
悠悠鴻門舞散玉斗碎吳宮鼓絕蛾眉愁銅花玉暈

文章露野人願致華陰土佩之自可無邪心袁公竒
術何足數先生揮毫山館中光芒似欲爭詞鋒白照
晴空鋪雪練碧涵秋水生芙蓉邀我一見神悽惻坐
歎毛錐老無策何當借我小試之目前且斲讒夫舌

古桂樹吟

六月十五日龍可道邀飲古桂樹下積雨初
晴綠陰如洗入夜酒酣可道立索詩因賦

六月塵沙倦長道却愛君家桂樹好桂樹未花意自
香暮雲捲雨秋先到月光滿地無灑掃石磴高低藉
幽草滿壺美酒共傾倒一洗煩襟靜懷抱昔年厦屋

高渠渠祇今結茅自有餘兄弟白頭俱孝友高堂慈
母多懽娛兵革未息民未蘇吾徒正合山巖居子弟
長大宜讀書浮雲富貴何有無桂樹與人共長久
漫以栽培更深厚萬葉團陰烟霧間孤標發秀風霜後
半畝玲瓏斜月透翠光寒色浮衿袖八月花開我再
來君當剩貯千鍾酒

和醉李憲文送茶

鰲山峭石攢碧空物性苦硬氣所鍾野老鉏雲種茶
芽年深獲利盛農功雲蒸霧滃春濛濛一槍兩旂戟
東風采掇可以羞王公西山白雲將無同我家住近

鰲山下糴米買薪日無暇長夏飲水冬飲湯風月交
游足情話君年甚少甚瀟灑摘鮮分贈金同價已看
雀舌堆滿盤况復驪珠動盈把讀書窓深午烟微竹
爐石鼎生光輝玉川七碗喫不得以少為貴知音稀
君子浩蕩不可羈好追彩鳳天門飛白玉堂前春晝
永承恩拜賜龍團歸

寄周子諒

黃四如集二卷

人世近年不可道相逢但說滄洲好掃雲放鶴招飛
仙冠屨烟霞任顛倒琥珀香傾白玉壺珊瑚影拂紅
雲島洲前弱水知幾重跋予望之不能到滄洲美人

玉無瑕曳裾每在王侯家去年把釣桐江上驪珠飛
光照白沙野水平橋重回首夕陽門掩松陰斜関西
老子拂歸袖薄俗俯仰令人嗟我初去留謬長策遂
使諸生笑王式不論世事凋朱顏一隻老眼依然白
五月抱病山居窄展轉空窓想顏色丈夫豈作兒女
悲情深不免傷離別

為李伯謙題蟠桃三熟看壽白沙葉巡檢

瑶池春早群仙集東方小兒吹玉笛酒酣携得蟠桃
歸種向仙山人未識學仙之人寫作看風枝露葉青
扶踈三實垂垂世所無持贈將軍懽有餘長歌願祝
將軍壽千歲蟠桃千歲酒將軍自是山中人好與蟠
桃共長久丹鶴啣書昨日回為報蟠桃花又開南極
老人笑相待穩駕虹橋歸去來

題滾塵看

紫騮脫羈矜得意一團旋風捲平地氣猛欠伸赤汗
收尾長亂撒香塵起筋骨不與凡馬同始知貌在丹
青中門外水與天河通不然翻身當化龍

同李主敬題李南玉瑞竹詩卷

往來曾看瑞竹看君家盛事傳里閭阿翁抱孫宴賓
客祝詞盡誇鸞鳳維今日重看瑞竹記舊家文物君

能繼羽毛紅色彩雲端
啣着應作皇王瑞瑞竹脩脩
分兩岐節疎葉密寒參差濕團曉翠煙花結光浥空
青露點垂大安園中萬竿綠滿林春筍森群玉能使
一竿如此竒王猷借看情何足好縱長稍拂紫烟樽
前風月招飛仙培養深根子孫長主翁與竹俱千年

和宋竹坡見寄

長途浼浼塵沙黃車輪四角投何方歸來却笑同舍
郎致身何用多文章白紵吟魂消夜雨青燈華髮凝
秋霜鴻鴈南來同是客蘆花漠漠湖光白稻梁生計
良獨微入門誰肯相娛悅君家洞口垂紫蘿佩菊紉

蘭秋興多難第持盃共傾倒諸孫捧硯供吟哦溪上
群鷗飛欲下老翁自是忘機者脫巾醉眠呼不醒添
入畫舫甚瀟灑賦詩招我來相過樽中美酒搖紅波
便空相送飲一斗梅花稍上春如何

和羅明信見寄

憶昔羅浮遇仙伯河潤九里分餘澤翻雲覆雨幾晨
昏到今猶作飄蓬客平生論交無淺深抱琴但欲求
知音脩竹晚風留獨坐落花春晝愁孤吟遙望君家
片雲隔短竹化龍不堪策醉語狂談禮法疎知君於
我終無責天寒雨冷我欲歸君詩滿紙龍蛇飛去燕

來鴻增感慨兔絲松樹長因依

和丁與善

凍鶻不得棲上林
繳羽早飛空苦心是處掃愁一斗
酒長年知己孤桐琴緣誰推抱
遂至今萍水相逢共為客
燈火長淹風雨夕悵望鄉關歸計遲
幸陪杖屨歡情淡嗟我囊空無一錢
頭顱贏得千絲雪野性專於魚鳥親
始知嵇康交欲絕偶題詩句落人間
翫鶩伊優兩無遇舊遊舊釣總依然
不恨歸雲無託處杯行到君君莫止
酒醒明朝各分袂霜飛茅屋硯敲冰
月上空山劍如水寫詩持報賜九回
明年當復為君

來相思但見梅花月如對人啣酒盃

彭中和有贈松林墨蘭一幅許以貺余余故以

墨梅先之既而中和賜報以詩遂次韻復之

往年看花落春後金莖琪樹山中少
江上老梅迴瘦枝寫入山窓自妍好
君家雪壁空掛之繁花不逐東風老
共憐縞袂染緇塵何借微雲翳晴昊
開君舊貯書盡多松林墨蘭香未磨
奪取錦袍吾豈敢纏綿正好如松蘿
常笑虎頭每癡絕不見人間鴻爪雪
何當來徃翫心情梅有高標蘭有德

題李尚文少府所藏枯柳寒鴉圖

江邊獨柳飛群鴉敗枝殘葉秋風斜石泉可飲不可
啄似聳落日鳴啞啞一段淒涼幽思足忽憶看花過
常曲上林春早聽啼鶯太液波晴寫黃鵠

題周惟中所藏落鴈圖

燕鴻南飛幾千里紈素寫之不足咫老翮風高剪斷
雲寒影日沉迷亂葦野烟着樹淡微茫山雨欲來秋
滿堂不是主翁催飲酒祇疑短棹浮瀟湘

題邊桂節所藏雪夜訪戴圖

雪光兩岸流素月扁舟江上神仙客畫史相傳回棹
高政恐風流變蕭索何如入門各盡懽主翁有琴為

君彈梅邊醉漱瑤瑤寒絕勝恣恣借竹看

題劉氏雪翁吟卷

仙翁未老頭總白飄蕭兩鬢吹晴雪幾回覽鏡心自
疑却恠春風消不得面如紅玉眼如月徃徃問年驚
座客到今上馬不用扶風流文采居前列新築雪菴
倚山北竹門晝開紗帽窄花撲春缸酒氣香月臨秋
幌簫聲咽溪山畫圖甚奇絕萬事只從閒處閱歲寒
高誼誰與同獨見梅花好顏色玄陰崢嶸厚地裂朔
風如刀剪瑞葉雪翁長嘯雪菴中俯仰乾坤迥澄徹
襟懷寒浥水壺清標格烟如瑤樹潔近見麻姑兩鬢

霜染鬢始信皆無策何年竟掉剡溪船分我冰花沃
焦熟。

和酌黃用泰

聞君讀書近秋浦老大用心更清苦錦笈揮翰散晴
雲燈火隔窓聽夜雨前月西風送好音孤鴻蕩影愁
人心盈盈一水不相見千里命駕何由尋憶昔風塵
走長道曾宿君家碧雲島一時談笑君未忘十載淒
涼我重到思君長日臨溪頭蘆花吹雪迷歸舟官錢
當十足沽酒一時官錢何當一醉黃花秋

題楊節婦劉氏書卷

桐江江上望江水君家有母心相似母昔少年失所
天澄波千丈無泥滓瑤琴錦瑟六年中孤鸞曉飛繞
雲空丹心惟抱秋月白翠鬟不識春花紅老天夢夢
恨無子仙桂移根中道死稱來苦柏翠可食忽看滄
海飛塵起乃知為善報不虛諸孫文采珊瑚株讀書
既覩家聲振奉珍能盡閒居娛大府具狀上朝省烈
士聞之毛骨冷綸音早晚表門閭貞節芳名重鄉井
高年七十顏色和蟠桃千歲著花多史臣擬書列女
傳撫卷先為題長歌

寄胡伯清

諸公盡說為官好君獨胡為掛冠早朝上中臺脫繡
衣暮八南山卧烟草聖朝耳目寄所司青天尺五安
雲梯布衣承詔起江右飛雨隨車到浙西文采已為
當路重何乃抱材不終用徒步愁聞驄馬嘶舊名還
與沙鷗共自送子陵歸江湖清風高節何代無相逢
莫問諫大夫黃冠草服我自娛英雄出處不論命笑
指南山空捷徑鶴舞猿啼山月高酒熟魚肥溪雨溟
君今所得良已多功名富貴將柰何憑誰寄書與周
愷歸來好共釣烟波

和歐陽伯庸

飛光忽忽催人老白髮不期來獨早氣鍾寒柏兀孤
高目眩春花自顛倒平生籌策無一竒着身山巖乃
所宜往事盡付東流水惟有知心勞夢思酒酣拔劍
為君起愛君近來詩句美思君不見獨長哦一唱三
歎情未已結交何必黃金多長松千尺懸絲蘿王門
伶人不肖作其若高山流水何昨日花開今日落東
風雖好亦云惡百年會面能幾時乘興須來不須約

簡周文瞻

先生掛冠竟長往青山白雲注遐想姓名久在縉紳
間風節欲傾寮案上天柱峯高鬱蕭爽門前流水供

春釀小車駕鹿度松陰盤石彈琴峇泉響平生老筆
稱絕奇大小二篆皆吾師江虛白沙鐵錐立雲捲空
青玉筋垂襟懷浩蕩無所惜每逢好事能書之近來
題扁滿江右丞相中郎千載期往年下筆誰最妙聞
之獨數吳興趙綉衣御史又得名出處於君不同調
高齋日長客來少洗硯自瞰萍花沼晴雲飛動碧窓
間酒酣得意掀髯笑愧我還山茅結廬老去家貧且
讀書願求大字懸書屋一洗塵穢開清虛竹林雨過
暑氣無霜毫染墨多勤渠野人拜賜不敢隱虹光應
貫斗牛墟

同李立本贈醫

丈夫為醫真有道人間百病煎百草百草於人尚有
功聖謨砭訂誰當告聞君獨得聲名早上池分水洗
襟抱滿煎凋瘵生意回君來絕勝陽春到嗟余病癖
老更多療之無方愁絕倒錦袍霄漢夢荒涼白髮丘
園日枯槁平生頗嗜短長吟弄筆至今無一好久欲
尋醫今遇君安得從君共論討參苓芝朮俱等閒頂
門之鍼乃為寶

征婦別

征婦臨行曉粧薄上堂辭姑雙淚落含情欲訴哭聲

長一段淒涼動林壑從夫不辭行路羞婦去誰為養
姑謀婦人在軍古所忌今者召募如追囚十年婦姑
兵甘苦一室倒懸空四顧小郎早沒更無人却把晨
昏托隣婦情知送兒是埋兒姑年老大莫苦悲萬一
軍中廢機杼減米換衣當寄歸小旂叫呼催早別出
門便成千里隔今夜不聳喚婦聲愁心共掛天邊月

題金守正所藏謝君績秋山讀書圖

晴雲日高澹林木澗水縈迴繞茅屋白髮何人似我
閒長日空齋把書讀謝公湖海今倦游乃知筆力老
更道西山一點千仞秋臨風回首情悠悠

題袁寅亮進士所藏袁安卧雪圖

大雪僵眠呼不起錦袍公子何由至苦寒未可更干
人斯言便爾含春意他日登庸勲業崇素心已見早
微中党家歌舞擁爐紅歡娛一餉寒烟空盡史經營
自風致琪樹瓊花照天地舊家青氈君勿忘公侯子
孫當復始

題蕭質所藏終南雪霽圖

玉龍啣燭晴光吐恠底空簷響殘雨南山一夜服還
丹滄浪之髭總如故公子昨朝愁出戶錦袍圍春醉
歌舞赤脚老樵拾斷薪盡史何由得溪趣早梅回暖

動精神凍雀翻藜動毛羽筆端生意開
紉素恍然不記寒宵苦泥滑迢迢江上路
行客茅簷不少住世間捷徑渺何許
已有扁舟候江滸隔浦長橋似灞陵
何如着我騎驢去黑貂擁醉詩思多
明日歸來為君賦

送李原貞遊淮

君歸省親親已去如何又涉長淮道
長淮千里快壯遊不似班衣免戲好
棹歌聲齊催發船烟花看柳媚晴川
酒瀉紅光照白日詩傳佳句驚離筵
丈夫意氣吞餘子百年養親當養志
空山悵惓亦奚為捧檄曾聞為親喜
再拜勸君金巨羅問君年紀甚不多
漢皇

好少今若此攀龍早早騰銀河
白璧黃金無足惜庭闈懽聲勝歸日
鶯花春暖吳宮溪鴻鵠風高楚天碧

春暮吟

玉壺酤酒青絲絡啼鳥勸人滿盃酌
落紅滿地晴香消濕翠如烟午陰薄
盡樓玲瓏隔綵霞樓前隻鵲鳴啞啞
想見吳帆北風起王孫明日當還家

刲股歌為戴氏子賦

昔人狗恩自刲股儒生靳靳不相許
君今刲股母疾瘳一寸丹心吾所取
母年老大呻吟苦恨滿西山日將暮
斲苓粉參竟無補此事曾聞耆舊語
揮刀剗肉

號蒼天百靈昭昭瞰庭戶血流及屨不自知何暇更
要鄉里譽明朝問膳俱復初不用諸孫扶健步匹夫
精誠動天地六月飛霜有其故雪消修竹笋穿林日
射錦桃花滿樹春風轉暖春晝長滿壺美酒班衣舞
同宗第文炳宴集余以病不能往中和仲簡偕
行且有登覽之樂因事觸興形於詠歌俯仰
之間余不能無感焉聊復次韻

出門朝夕望西嶺白雲千頃儀形靜紫空飛徑愁躋
攀玄猿抱子行相引眼空不覺梯身高羲和回車近
人頂老樹憑風爭怒號危峯拔地相撐挺絕谷遙聞

瀑水聲微雲忽隨孤鳶影吾宗結屋紫翠間髣髴人
烟似仙境主翁呼酒醉東籬一曲未終俱酩酊白髮
簪花人更嗤豈為諸生玩光景蘭茝已隨蕭艾化人
情不似江流永曲彈別調終無聞藝入剝員空自逞
軟盟惟待桑苧翁長向空山煮春茗翻雲復雨胡不
然撫事送今夢初醒江山千里老驥鳴風露五更孤
月烟閉門落葉紅滿階賦筆登高再難騁只將緘默
謝友朋混沌何由效溟滓

荆軻詞

燕山雪飛青宮閉氍毹夜暖沉沉醉北斗黃金何足

多一筋淚恩美人臂寒風蕭蕭度易水七首光芒泣
神鬼畢竟明年祖龍死恨不報君為君喜

張良詠

韓成未死思報秦漢燒棧道吾兵神韓成已死思報
楚始知漢王乃天與昨日相送赤松子今日已見淮
陰死控御天下漢業崇不受控御真英雄

石崇詠

樓上唱歌舞綠珠樓前馳檄收齊奴紅裙飛墜喚不
甦一死不救赤族誅倚闌恨不忍斯須緹縈沒身尚
可畜報恩但願主翁壽傾城顏色何代無

王猛詠

五馬渡江老臣泣垂死丹心在王室當年非不思南
來王謝豈能生羽翼魏相張儀尚為秦聊借羗符展
寸力江南雖僻不可畜青史千年誰獨識

乙卯新元余年六十目病又甚撫今懷昔感慨
係之適諸弟姪來賀因賦長句

憶昔軍麾滿南國性命一絲懸一息老天與年補長
貧白髮蕭蕭今六十崑前桂樹倚半空臺上牡丹高
數尺雨露皇天根后土前輩風流我何及燈火讀書
眼盡昏杖屨遊山足無力齒牙動搖亦已落逆旅應

催早行客高陽酒徒誰獨存蘇門先生人未識春雨
魂消常曲花秋風怨入山陽笛檢束方知禮法踈笑
談尚倚心情密甕頭新酒甜如蜜群送彬彬賀元日
一庭晴色毳袍輕醉筆重拈百憂失

高節宅中秋宴集

十年不到桐江上盡棟飛甍歛高爽長風送月作中
秋主翁携客傾家釀筠谷山人飲不多半醉半醒發
清唱嫦娥恠我髮星星笑談猶作青年想千里嬋娟
千里情不期此夜送君賞丹桂香清白露飛黃蘆葉
碎微風響好懷得酒須放蕩何必拘拘絆塵鞅圓缺

陰晴轉眼間古人今人幾惆悵但得明年有此情抱
琴江上重相訪

十七日飲蕭觀遠宅候竹坡不至

候君直過橫塘曲白藕作花浸寒玉秋香捲入桂樹
枝主翁新酒今朝熟待君共泛盃中綠前輩風流照
心目白髮雲間不可招離情寫向窓西竹

和周公明兼柬李子晦

聞君何從得拱壁神功雕琢無難色如此奇材自不
多况復芳年何可及事業雲霄應有時學問淵源豈
無極論交每恨識君遲下筆還能愈吾疾自送患眼

親舊踈空堦落葉無行迹相知誰似李先生精神玉
立仙中客軒昂自是離鷄群骯髒何慚倚門側每送
東阡望南陌十日不見苦愁絕隴頭春色入梅稍俯
仰流光長歎息王粲登樓不自聊季子多金又何益
相逢各賦去來篇官家已見頒新曆

贈曾葵師

洙泗水西馬鬣封龍虎山下留侯宮當時相地果誰
在能使累世疏恩隆聖人立參天地功老莊之說將
無同後來作者終萬一輸金償璧言非空廬陵老仙
魯艮峯拂衣光吐蒼精龍奇觀欲凌嵩華上寓迹多
在衡湘中卓卓景純書滿腹昂昂盧植虛如鐘夜語
飛觴驚座客曉行控鶴追仙跡恩流黃泉舞白骨義
激窶子撼王公我今白髮飄亂蓬惜我與君不早逢
邂逅今日無匆匆神仙骨相須英雄薰天富貴非我
蒙再拜何策驅詩窮

寄友

江波茫茫雪千頃斜陽閃閃歸帆影行人過盡不逢
君綠酒滿盃誰共飲飛光如水不可留思君如仙不
可求風捲落紅千萬片滿空散作相思愁

丙辰上巳與新喻龔履芳同郡周公明羅澄淵

諸孫仲雍登南山絕頂歸息于雩壇意驩如
也公明賦長句次韻

老懷耻為遠指柔常恨不得登三丘春花滿眼春日
美江山何往非勝遊啼鶯一聲碎幽寂南山向日如
初覲碧桃紅杏相送迎翠柏蒼松分主客目送飛雲
不可攀巨石人立當前闕飛迳萦迴不知遠相逢樵
牧俱懽顏桐江如帶繞咫尺髣髴青原雲外碧鴻鵠
凌飛天地寬蛟龍捲水滄溟窄第一峯尖知幾盤足
力雖乏飛吟魂蘭亭陳迹不復見有酒自可開窪樽
龔公氣宇剡嶠崒周郎風韻甚超越俯仰乾坤散百

憂人烟縹緲神仙窟題名絕壁慚魯臯輸君年少筆
力高好詩不作山靈贈往返笑我成徒勞紛紛餘子
風斯下只合送今結鷗社歸來高詠舞雩風一幅畫
圖無買價惜哉蕭郎阻天涯回首悵望重咨嗟人生
離合各有數苦吟能使髮鬢華我今萬事慵不理空
抱長琴寄流水他年上已欲登高故事相傳自今始

春夜吟

月色如水花如雲美人樓上歌迴紋棲鴉飛起玉階
樹香風吹動殷紅裙去年寄書到君側書中只寫思
君切感情知人老髮如絲君歸不恨緣君白挿花記月

夜未央他人苦短我苦長若使驅車到家日天涯芳草愁茫茫

狂客行

美人當窓捲珠箔狂客花陰彈黃雀黃雀低回嬌不飛金丸偏着搔頭落與君未展平生親柰何調笑如無人萬一樓頭是夫婿百年恨怨將誰陳君心誤認雙蝴蝶搖蕩迷魂招不得

題山水圖

我行不到山中久忽見青山為回首似聞流水響鳴琴恍若寒雲落襟袖松下茅菴絕瀟灑甚欲從之度

長夏振衣大笑問主人主人道是孫郎畫

明妃曲與宜春龍旂餘杭吳植真定魏巖分題

並賦

女無妍醜入宮見妬縱使色傾城不如嫁鄉土承恩初駕七香車豈知今日馬上彈琵琶氈車飛白雪茸帽吹黃沙不恨君王棄我天之涯却恨父母嫁我天王家自入宮門一回首薔薇香銷縷金袖泪痕長伴守宮紅誤人何待毛延壽將心寄語後代人負賤關天不繫身隴頭萬一無青草埋沒風沙空苦辛

雙蓮曲

鑑湖上復蓮開綵雲不收並香腮二喬卧讀兵書倦
鏡光如水臨粧臺兩心本同意羅襪凌波回冰絲透
骨成連理紅鮮翠濕鴛鴦猜錦筵美人荷葉杯勸酒
滿飲舞袖迴綠房青子無相催牡丹凋瘁秋菊摧奇
祥異瑞君須培明日之日好音來共飛霞佩歸蓬萊
五雲宮闕高崔嵬

射虎行贈射虎人

昨日射虎南山巔悲風蕭蕭眼力穿今日射虎北山
下虎血濺衣山路夜朝朝射虎無空歸家人望斷孤
雲飛度嶺踰山弓力健虎肉共分不辭遠府司帖下
問虎皮高枕鬪髀醉不知虎昔咆哮百獸走一死寧
知在君手鼻端出火耳生風拔劍起舞氣如虹昨夜
空村見漁火牛羊不收犬長卧作詩贈君毛髮寒煩
君為我謝上官君不見昔日劉昆稱長者虎北渡河
不須射

延桂堂辭為李茂才賦

桂樹團團予堂之下仰承元氣兮根后土偃蹇蕭參
予枝交互離立不群兮儼賓主堂中人予啓瑤戶攀
援桂枝兮獨延佇被蓀蘭兮庭堦秋風起兮滿懷日
暮兮遠望江之水兮潏潏翁芳馨予秋滿林思美人

兮懸素心鬱兮汲露草霍靡石嶽峯掃白雲兮彈瑤
琴抱明月兮知音酌桂酒兮堂之中子慕余兮聊春
容嫋嫋子秋風羗獨立兮靡逆虎豹遁兮晝寂白露
湛兮寒滴寵從兮淒淒蕭蕭兮颯颯發長嘯兮攬清
秋携美人兮醉我醅慨世俗兮悠悠扳援桂枝兮長
淹留

贈王儀

曉日照射碧海之珊瑚我思君兮文采殊明月飛光
萬頃之秋水我思君兮情調美朝騁望子朱戶夕夷
猶兮綵舟迴棹雙溪花雨暝捲簾萬壑松風秋昨日

偶相遇池館邀我住我有閒愁千萬縷掛在落日寒
煙之古樹抽刀割之斫擲向東流去丈夫磊落天地
間傾人意氣移南山干戈湍眼吾道喪今日見君多
厚顏厚顏君莫哂壚頭酒壓黃花脂典衣且漫送君
飲悲歌擊劍晴光吐虹跨海斬鯨誰知雌雄半天飛
雨萬里長風夜窺玉匣雙龍騰空

金雀屏送人往章貢成姻

金雀屏翠羽紅翎照簾幙馬上郎君雙箭飛佳期不
負藍橋約藍橋咫尺間青鸞去後還桃花曉泛春江
煖玄霜夜搗仙宮閑仙宮閑情窈窕重開金雀屏拍

手迎郎咲流蘇帳煖酒微醒銀燭花高漏聲曉

賦得籬上雀送空春龍旗伯章赴長沙

瞻彼上林萬木交錯爾獨何為傍籬落不如南溟鵬
又不似遼東鶴高飛無力天地遠短棘踈烟晚蕭索
遺穗蕩盡山田空虞羅不收溪雨作未看春日百花
晴寧惜窮陰一枝惡嗚呼壯士當雄飛八翼天風散
寥廓紫鸞丹鳳參翱翔愧爾喁喁籬上雀

靜思先生詩集卷之上終



程